

Li boneûr, ça n'ègzistéye nin ?

Si vos waïtoz tot-autoû d' vos, gn-a branmint d'pus d' miséres qui d' djôyes. Tot l' monde a l'aîr d'enn'awè s' sô.

Gn-a wêre di djins qui sorîyenut.

'L èst vraî qui l' boneûr sins r'lache, ça n'ègzistéye nin, à paurt quéquefîye po saquants-inocints quatôze.

Portant...

Si on cache bin après, li boneûr si fait tos lès djoûs, picote à migote, mins i n' dure qui wêre di timps.

C'èst come one fleûr : ça n' dure qu'on momint.

I nos l' faut coude fait-à fait.

I n' faut nin lèyî passer s' toûr.

Adon, qwè fé ?

Drouvans nos-ouys èt nos-orèyes grands au laudje.

I-gn-a autoû d' nos-ôtes tot plin di p'tits boneûrs.

One saquî qui v' fait on sorîre, i mèt do solia dins vosse keûr (oudobin i vos fait dire : i s' fout d' mi, cit'la !)

One pitite fleûr su l' bwârd dèl vôye, c'èst l' pus bia dès tauvias (one mwaîje yèbe, oyi !)

Si vos r'waïtoz avou vosse keûr, c'èst l' boneûr !

Ôtrèmint, c'èst l'infîr.

Tos lès quinze djoûs, aviè sèt' eûres al nét, nos nos r'trovans po djâser l' walon.

Nos rovians nos-anôyes deûs-eûres au long èt viker foû do timps.

Por mi, c'è-st-on boneûr di cint èt vint munutes, on p'tit bokèt d' paradis !

Po ça, mèrci mès djins !

André Debources